

**FRAMKVÆMDARREGLUGERÐ FRAMKVÆMDASTJÓRNARINNAR (ESB)  
nr. 828/2014****2015/EES/16/13****frá 30. júlí 2014****um kröfur um miðlun upplýsinga til neytenda um að matvæli séu glútenlaus eða glútenskert (\*)**

FRAMKVÆMDASTJÓRN EVRÓPUSAMBANDSINS HEFUR,

með hliðsjón af sáttmálanum um starfshætti Evrópusambandsins,

með hliðsjón af reglugerð Evrópuþingsins og ráðsins (ESB) nr. 1169/2011 frá 25. október 2011 um miðlun upplýsinga um matvæli til neytenda <sup>(1)</sup>, einkum d-lið 3. mgr. 36. gr.,

og að teknu tilliti til eftirfarandi:

- 1) Fólk með garnaimein af völdum glútenþols (*e. coeliac disease*) er haldið varanlegu glútenþoli. Hveiti (þ.e. allar tegundir af ættkvíslinni Triticum, t.d. harðhveiti, spelt og taumhveiti), rúgur og bygg eru korntegundir sem sýnt hefur verið fram á með vísindalegum rannsóknum að innihalda glúten. Glútenið, sem er í þessum korntegundum, getur haft skaðleg áhrif á heilbrigði fólks, sem er með glútenþol, sem ætti því að forðast að neyta þeirra.
- 2) Upplýsingar um það hvort matvæli eru glútenlaus eða glútenskert ættu að auðvelda fólki með glútenþol að bera kennsl á og velja fjölbreyttra fæðu, hvort sem hennar er neytt innan eða utan heimilisins.
- 3) Í reglugerð framkvæmdastjórnarinnar (EB) nr. 41/2009 <sup>(2)</sup> eru settar fram samræmdar reglur um upplýsingar sem neytendum eru veittar um það hvort matvæli séu án glútens („glútenlaus“) eða glútenskert („mjög lítið glúteninnihald“). Reglurnar í þeirri reglugerð byggjast á vísindagögnum og tryggja að ekki sé villt um fyrir neytendum eða þeir ruglaðir í ríminu með upplýsingum sem eru veittar á mismunandi grundvelli um það hvort matvæli eru glútenlaus eða glútenskert.
- 4) Með skírskotun til endurskoðunar á löggjöf um matvæli sem eru ætluð til sérstakra, næringarlegra nota fellir reglugerð Evrópuþingsins og ráðsins (ESB) nr. 609/2013 <sup>(3)</sup> reglugerð (EB) nr. 41/2009 úr gildi frá 20. júlí 2016. Í samræmi við kröfurnar, sem mælt er fyrir um í 2. mgr. 36. gr. reglugerðar (ESB) nr. 1169/2011, ætti að tryggja að eftir þann dag sé miðlun upplýsinga um að matvæli séu glútenlaus eða glútenskert áfram byggð á viðeigandi vísindagögnum en ekki á mismunandi grundvelli sem gæti villt um fyrir neytendum eða ruglað þá í ríminu. Því er nauðsynlegt að tryggja að samræmdum skilyrðum fyrir beitingu þessara krafna um matvælaupplýsingar, sem stjórnendur matvælaupplýsinga veita að því er varðar hvort matvæli séu glútenlaus eða glútenskert, sé viðhaldið í Sambandinu og þessi skilyrði ættu að byggjast á reglugerð (EB) nr. 41/2009.
- 5) Tiltekin matvæli matvæli hafa verið sérstaklega framleidd, tilreidd og/eða unnin til að draga úr glúteni í einu eða fleiri innihaldsefnum sem innihalda glúten eða til að skipta innihaldsefnum sem innihalda glúten út fyrir önnur innihaldsefni sem eru án glútens frá náttúrunnar hendi. Önnur matvæli eru eingöngu framleidd úr innihaldsefnum sem eru án glútens frá náttúrunnar hendi.
- 6) Það er verulegum, tæknilegum örðugleikum bundið og dýrt að fjarlægja glúten úr korntegundum, sem innihalda glúten, og því er erfitt að framleiða matvæli úr slíku korni sem eru algjörlega án glútens. Þar af leiðandi geta ýmis matvæli á markaðnum, sem eru sérstaklega unnin til að draga úr glúteninnihaldi í einu eða fleiri innihaldsefnum sem innihalda glúten, innihaldið lítið magn glútenleifa.

(\*) Þessi ESB-gerð birtist í Stj. 2015, L 228, 31.7.2014, bls. 5. Hennar var getið í ákvörðun sameiginlegu EES-nefndarinnar nr. 13/2015 frá 26. febrúar 2015 um breytingu á II. viðauka (Tæknilegar reglugerðir, staðlar, prófanir og vottun) við EES-samninginn, biður birtingar.

<sup>(1)</sup> Stj. 2011, L 304, 22.11.2011, bls. 18.

<sup>(2)</sup> Reglugerð framkvæmdastjórnarinnar (EB) nr. 41/2009 frá 20. janúar 2009 um samsetningu og merkingu matvæla sem henta fólki með glútenþol (Stj. 2009, L 16, 21.1.2009, bls. 3).

<sup>(3)</sup> Reglugerð Evrópuþingsins og ráðsins (ESB) nr. 609/2013 frá 12. júní 2013 um matvæli sem eru ætluð ungbörnum og smábörnum, matvæli sem eru notuð í sérstökum læknisfræðilegum tilgangi og þyngdarstjórnunarfæði í stað alls annars fæðis og um niðurfellingu á tilskipun ráðsins 92/52/EEB, tilskipunum framkvæmdastjórnarinnar 96/8/EEB, 1999/21/EB, 2006/125/EB og 2006/141/EB, tilskipun Evrópuþingsins og ráðsins 2009/39/EB og reglugerðum framkvæmdastjórnarinnar (EB) nr. 41/2009 og (EB) nr. 953/2009 (Stj. 2013, L 181, 29.6.2013, bls. 35).

- 7) Flestir einstaklingar með glútenóþol geta neytt hafra sem hluta af fæði sínu án þess að það hafi skaðleg áhrif á heilbrigði þeirra. Vísindasamfélagið rannsakar nú þetta álitaefni. Það er þó verulegt áhyggjuefni að hafrar geta mengast af hveiti, rúgi eða byggi í tengslum við uppskeru kornsins, í flutningi, við geymslu eða vinnslu þess. Taka skal tillit til áhættu á glútenmengun í vörum sem innihalda hafra í tengslum við viðeigandi upplýsingar sem stjórnendur matmælafyrirtækja veita á þessum matvælum.
- 8) Sumir einstaklingar með glútenóþol kunna að þola lítið eitt af glúteni í mismunandi magni og innan vissra marka. Til að gera einstaklingum kleift að finna ýmiss konar matvæli á markaðnum, sem henta þörfum þeirra og næmi, eiga þeir að geta valið úr vörum, sem innihalda lítið glúten en þó mismikið af því, innan þessara marka. Það er þó mikilvægt að mismunandi vörur af þessu tagi séu rétt merktar og að aðildarríkin stuðli að upplýsingaferðum til að tryggja að fólk með glútenóþol noti þessar vörur rétt.
- 9) Það ætti að vera mögulegt að merkja matvæli, sem eru sérstaklega framleidd, tilreidd og/eða unnin til að draga úr glúteninnihaldi í einu eða fleiri innihaldsefnum sem innihalda glúten eða til að skipta innihaldsefnum, sem innihalda glúten, út fyrir önnur innihaldsefni sem eru án glútens frá náttúrunnar hendi, með upplýsingum sem gefa annað hvort til kynna að þau séu án glútens („glútenlaus“) eða þau séu glútenskert („afar lítið glúteninnihald“) í samræmi við ákvæðin sem mælt er fyrir um í þessari reglugerð. Einnig ætti að vera mögulegt að merkja þessi matvæli til að upplýsa neytendur um að þau séu sérstaklega samsett fyrir fólk með glútenóþol.
- 10) Einnig ætti að vera mögulegt, í samræmi við ákvæðin sem mælt er fyrir um í þessari reglugerð og að því tilskildu að farið sé að almennum skilyrðum um sanngjarnar starfsvenjur við upplýsingagjöf, sem eru settar fram í reglugerð (ESB) nr. 1169/2011, að matvæli með innihaldsefnum, sem eru laus við glúten frá náttúrunnar hendi, séu merkt með upplýsingum sem gefa til kynna að þau séu glútenlaus. Matvælaupplýsingar ættu fyrst og fremst ekki að vera villandi með því að gefa í skyn að matvælin hafi tiltekna séreiginleika ef öll svipuð matvæli hafa í raun slíka eiginleika.
- 11) Með tilskipun framkvæmdastjórnarinnar 2006/141/EB <sup>(4)</sup> er lagt bann við notkun innihaldsefna sem innihalda glúten við framleiðslu ungbarnablöndna og stoðblöndna. Þess vegna skal bannað að nota yfirlýsingarnar „afar lítið glúteninnihald“ eða „glútenlaust“ í tengslum við upplýsingar á slíkum vörum þar eð samkvæmt þessari reglugerð eru þessar yfirlýsingar notaðar til að tilgreina að glúteninnihald sé annars vegar ekki yfir 100 mg/kg og hins vegar ekki yfir 20 mg/kg.
- 12) Að því er varðar þessa reglugerð ætti að taka viðeigandi tillit til Codex-staðalsins um matvæli til notkunar í tengslum við sérstakt mataræði einstaklinga með glútenóþol <sup>(5)</sup>.
- 13) Ráðstafanirnar, sem kveðið er á um í þessari reglugerð, eru í samræmi við álit fastanefndarinnar um matvælaferlið og heilbrigði dýra.

#### SAMÞYKKT REGLUGERÐ ÞESSA:

*1. gr.*

#### **Gildissvið og viðfangsefni**

Reglugerð þessi gildir um miðlun upplýsinga til neytenda um að matvæli séu glútenlaus eða glútenskert.

<sup>(4)</sup> Tilskipun framkvæmdastjórnarinnar 2006/141/EB frá 22. desember 2006 um ungbarnablöndur og stoðblöndur og um breytingu á tilskipun 1999/21/EB (Stjótd. ESB L 401, 30.12.2006, bls. 1).

<sup>(5)</sup> Codex STAN 118–1979.

## 2. gr.

**Skilgreiningar**

Í þessari reglugerð er merking eftirfarandi hugtaka sem hér segir:

- a) „glúten“: prótínþáttur úr hveiti, rúgi, byggi, höfrum eða vixluðum yrkjum af þeim og afleiðum, sem sumir einstaklingar hafa óþol fyrir og sem er óleysanlegur í vatni og 0,5 M natríumklóríðlausn,
- b) „hveiti“: allar tegundir af ættkvíslinni *Triticum*.

## 3. gr.

**Upplýsingar fyrir neytendur**

1. Ef yfirlýsingar eru notaðar til að miðla upplýsingum til neytenda um að matvæli séu glútenlaus eða glútenskert skulu slíkar upplýsingar eingöngu gefnar með yfirlýsingunum og í samræmi við skilyrðin sem eru sett fram í viðaukanum.
2. Matvælaupplýsingunum, sem um getur í 1. mgr., mega fylgja yfirlýsingarnar „hentar fólki með glútenóþol“ eða „hentar fólki með garnamein“.
3. Matvælaupplýsingunum, sem um getur í 1. mgr., mega fylgja yfirlýsingarnar „sérstaklega samsett fyrir fólk með glútenóþol“ eða „sérstaklega samsett fyrir fólk með garnamein“ ef matvælin eru sérstaklega framleidd, tilreidd og/eða unnin til að:
  - a) draga úr glúteninnihaldi í einu eða fleiri innihaldsefnum sem innihalda glúten, eða
  - b) skipta innihaldsefnum, sem innihalda glúten, út fyrir önnur innihaldsefni sem eru án glútens frá náttúrunnar hendi.

## 4. gr.

**Ungbarnablöndur og stoðblöndur**

Leggja skal bann við miðlun upplýsinga um að ungbarnablöndur og stoðblöndur, eins og þær eru skilgreindar í tilskipun 2006/141/EB, séu glútenlausar eða glútenskertar.

## 5. gr.

**Gildistaka og beiting**

Reglugerð þessi öðlast gildi á tuttugasta degi eftir að hún birtist í *Stjórnartíðindum Evrópusambandsins*.

Hún gildir frá og með 20. júlí 2016.

Reglugerð þessi er bindandi í heild sinni og gildir í öllum aðildarríkjunum án frekari lögfestingar.

Gjört í Brussel 30. júlí 2014.

*Fyrir hönd framkvæmdastjórnarinnar,*

José Manuel BARROSO

*forseti.*

*VIÐAUKI***Yfirlýsingar sem leyfilegt er að nota að því er varðar hvort matvæli eru glútenlaus eða glútenskert og skilyrði þar að lútandi****A. Almennar kröfur****GLÚTENLAUS**

Yfirlýsinguna „glútenlaus“ má aðeins nota um matvæli, eins og þau eru seld til lokaneytanda, ef þau innihalda ekki meira en 20 mg/kg af glúteni.

**AFAR LÍTIÐ GLÚTENINNIHALD**

Yfirlýsinguna „afar lítið glúteninnihald“ má aðeins nota um matvæli sem eru úr eða innihalda eitt eða fleiri innihaldsefni úr hveiti, rúgi, byggi, höfrum eða víxluðum yrkjum, sem hafa verið sérstaklega unnin til að draga úr glúteni, sem innihalda ekki meira en 100 mg/kg af glúteni í matvælunum eins og þau eru seld til lokaneytenda.

**B. Viðbótarkröfur varðandi matmæli sem innihalda hafra**

Hafrar í matvælum sem eru kynnt sem glútenlaus eða með afar lítið glúteninnihald verða að hafa verið sérstaklega framleiddir, tilreiddir og/eða unnir þannig að komið sé í veg fyrir mengun af hveiti, rúgi, byggi eða víxluðum yrkjum af þeim og glúteninnihald slíkra hafra má ekki fara yfir 20 mg/kg.

---